

Deinde accedens ante medium altaris, ubi iterum, ut prius genuflexus, dicit altius cantando: **Ad multos annos.**

Postea accedit ad pedes Consecratoris, ubi tertio genuflexus, ut supra, iterum altius cantando dicit: **Ad multos annos.**

Et continuo Consecrator recipit eum surgentem ad osculum pacis; et similiter faciunt assistentes Episcopi.

His ab unoquoque eorum ordinatim peractis, Episcopi assistentes eosdem Consecratos cum mitra, et baculo Pastoralis incedentes, et Evangelium sancti Joannis, **In principio erat Verbum, etc.** dicentes, post reverentiam cruci super altari factam, inter se medios ducentes, ad propriam capellam revertuntur. Consecrator vero, pacis osculo, ut præmittitur, Consecratis dato, dicit submissa voce:

Dóminus vobíscum.

Inítium sancti Evangélii secúndum Joánnem.

In principio erat Verbum, etc.

Signat altare, et se; et facta similiter cruci reverentia, apud sedem vel faldistorium deponit sacras vestes.

Interim tam Consecrator quam Consecrati, dum ipsi quoque sacris se exuunt indumentis, recitant submissa voce Antiphonam **Trium puerórum, etc.** et Canticum, **Benedicite, etc.**

Tandem Consecrati ad Consecratorem accedentes eidem, et Assistentibus suis, pro more, gratias agunt; et vadunt in pace omnes.

Quando Electus in Patriarcham, vel Archiepiscopum consecratur, forma præmissa in omnibus observatur; sed per hujusmodi consecrationem non assumit sibi nomen Patriarchæ, vel Archiepiscopi, quod per traditionem Pallii dumtaxat sibi attribuitur, usque ad quam dicitur Electus, etiam post consecrationem prædictam. Electus vero in Episcopum, cum primum consecratus est, Episcopus vocatur, non Electus.

In anniversario consecrationis Episcopi dicitur Missa ut in Missali Romano.

RITUS PONTIFICALIS

PRO CELEBRANDO SACRAMENTO MATRIMONII.



Altare decentiori pallio coloris albi, tobaleisque mundis ornetur cum tapete super gradus extenso, et pulvinari ad genuflectendum. Paretur quoque faldistorium super ipsum altare, quatuor saltem candelabra cum cereis albis, et Crux in medio illorum.

Paretur etiam abacus sive credentia, super qua erunt vas aquæ benedictæ cum aspersorio; pelvicula pro deponendo annulo, dum benedicitur; bugia cum candela; Liber hic, sive Rituale Romanum, et si benedicuntur nuptiæ, parentur quoque omnia ad Missam necessaria cum hostiis pro communione Sponsi et Sponsæ; velum ante ipsos communionis tempore extendendum; vas cum vino, et mappula pro illorum purificatione; instrumentum ad osculum pacis cum velo coloris ceteris paramentis missalibus uniformis, ad ipsius manubrium appenso.

Super altari in medio: Pluviale cum stola coloris albi, Crux pectoralis, cingulum, alba, amictus, et omnia oblongo ejusdem coloris velo cooperiuntur: mitra auriphrygiata, et velum pro ministro de ea inserviente: et baculus Pastoralis, si eo utatur.

Adsint ad minus quatuor Capellani superpelliceis induti, et duo testes; quorum nomina excipientur in scriptis.

Scribentur etiam in pagella nomina cum Sponsi, tum Sponsæ, quam accedentem ad contrahendum Matrimonium cohonestari decet præsentia parentum vel propinquorum.

His omnibus ordinatis, Pontifex accedit ad altare, aliquantulum orat genuflexus; et si erit Missam celebraturus, accedit ad Sedem si fuerit in Ecclesia propria, vel ad faldistorium, in cornu Epistolæ altaris paratum, ubi sedens recitat Psalmum, **Quam dilécta, etc.**, cum suis Capellanis.

Post orationes lavat manus et induitur supra rochetum, vel supra superpelliceum, si fuerit Regularis, amictu, alba, cingulo, Cruce pectorali, stola, et pluviali coloris albi, deinde accipiet formale, si eo utatur, mitram et baculum Pastoralem; ascendit ad altare, quod in medio osculatur. Tum, deposito baculo, sedet super faldistorio, ante medium altaris allato, renibus ipsi altari conversis.

Vocantur Sponsus et Sponsa, qui debito venerationis actu accedentes coram Pontifice genuflectunt; muliere ad sinistram viri stante.

Pontifex adhuc cum mitra sedens, eos sigillatim interrogat coram tribus, vel duobus testibus de consensu in matrimonium; proprio quemque nomine vocans, et patrio sermone alloquens primo virum, mox mulierem, in hunc modum:

N. volete ricevere N. qui presente per vostra legittima moglie secondo il Rito della Santa Madre Chiesa?

Id est: **N. vis accipere N. hic præsentem in tuam legítimam uxórem juxta Rítum sanctæ Matris Ecclésiæ?**

Respondeat Sponsus: **Volo.**

Recepto viri consensu per verbum: **Volo**, vel aliud sensibile signum, mulierem interrogat:

N. volete ricevere N. qui presente per vostro legittimo marito secondo il Rito della Santa Madre Chiesa?

Hoc est: **N. vis accipere N. hic præsentem in tuum legítimum marítum juxta Rítum sanctæ Matris Ecclésiæ?**

Recepto mulieris consensu, quæ similiter respondere debet: **Volo.**

Nec sufficit consensus unius, sed debet esse amborum, et expressus aliquo signo sensibili, sive fiat per se, sive per procuratorem.

Mutuo igitur contrahentium consensu intellecto, Pontifex jubet eos invicem jungere dexteras, dicens:

Ego conjúngo vos in matrimónium. In nómine Pa tris, et Fí lii, et Spíritus sancti. R. Amen.

Vel aliis verbis utatur juxta receptum uniuscujusque provinciæ ritum: postea surgens cum mitra, eos aspergit aqua benedicta. Mox deposita mitra, et ad altare conversus, annulum super pelvicula sibi oblatum benedicat.

BENEDICTIO ANNULI.

V. Adjutórium nostrum in nómine Dómini.

R. Qui fecit cœlum et terram.

V. Dómine exaúdi oratiónem meam.

R. Et clamor meus ad te véniat.

V. Dóminus vobíscum. R. Et cum spíritu tuo.

Orémus.

Benedic ✠, Dómine, ánnulum hunc, quem nos in tuo nómine bene ✠ dicimus, ut quæ eum gestáverit, fidelitátem íntegram suo sponso tenens, in pace et voluntáte tua permáneat, atque in mútua caritáte semper vivat. Per Christum Dóminum nostrum.

R. Amen.

Deinde Pontifex aspergat annulum aqua benedicta in modum crucis: postea iterum sedeat accepta mitra: et tradat annulum benedictum Sponso, qui statim illum ponit in digito annulari sinistræ manus Sponsæ, Pontifice dicente:

In nómine Pa ✠ tris, et Fy ✠ lii, et Spíritus ✠ sancti. Amen.

Tum cantatur, vel legitur sequens Antiphona, Pontifice adhuc cum mitra sedente:

Ant. Confirma hoc, Deus, quod operátus es in nobis a templo sancto tuo, quod est in Jerúsalem.

V. Glória Patri, et Fílio, et Spíritui sancto.

R. Sicut erat in princípío, et nunc, et semper, et in sæcula sæculórum. Amen.

Et repetitur vel legitur Antiphona:

Confirma hoc, Deus, quod operátus es in nobis a templo sancto tuo, quod est in Jerúsalem.

Qua repetita, Pontifex, deposita mitra, surgit, et stans versus ad Sponsum et Sponsam, dicit super eos, manibus junctis:

Kýrie eléison. **Christe** eléison. **Kýrie** eléison.

Pater noster, etc. **secreto.**

V. Et ne nos indúcas in tentatiónem.

R. Sed libera nos a malo.

V. Salvos fac servos tuos. **R.** Deus meus, sperántes in te.

V. Mitte eis Dómine auxiliúm de sancto.

R. Et de Sion tuére eos.

V. Esto eis Dómine turris fortitúdinis.

R. A fácie inimíci.

V. Dómine exaúdi oratiónem meam.

R. Et clamor meus ad te véniat.

V. Dóminus vobíscum. **R.** Et cum spíritu tuo.

Orémus.

Réspice, quæsumus Dómine, super hos fámulos tuos, et institútis tuis, quibus propagatiónem húmáni géneris ordinásti, benignus assiste; ut qui te auctóre jungúntur, te auxiliánte servéntur. Per Christum Dóminum nostrum. **R.** Amen.

His expletis, si benedicendæ sint nuptiæ, aliquantulum recedentibus in partem Conjugibus, Pontifex parat se ad Missam, ut infra dicitur: sin minus, absoluta supradicta Oratióne, iterum sedet, accipit mitram, et gravi sermone alloquitur Sponsum et Sponsam adhuc coram se genuflexos, admonendo eos, ut sibi invicem fidem servent: Orationis tempore, et præsertim jejuniorum ac

solemnitatum, casti permaneant: et vir uxorem, atque uxor virum diligit, et in timore Dei maneant.

Postea, accepto aspersorio, surgit, et super eos iterum fundit aquam benedictam.

DE BENEDICTIONE NUPTIARUM.

Si, contracto jam Matrimonio, Pontifex celebraturus sit Missam, ut nuptias benedicat, quæ numquam benedicuntur, si mulier sit vidua; post Oratióne supradictam, si celebrationi Matrimonii ipse astitit, descendit ante altare, ubi, depositis mitra, et pluviali, induit paramenta missalia coloris temporis congruentis.

Si fuerit dies Dominica, vel festum de præcepto, aut occurrat Officium primæ vel secundæ classis, Missa erit de Dominica, vel festo cum commemoratione pro Sponso et Sponsa: in aliis vero diebus, etiamsi ritu duplicis majoris vel minoris, Missa erit pro Sponso et Sponsa ex votivis in fine Missalis.

Pontifex legit totam Missam usque ad Pater noster, inclusive; quo absoluto, antequam dicat: Libera nos, quæsumus Dómine, facta sanctissimo Sacramento genuflexione, convertit se versus Sponsum et Sponsam, ante altare genuflexos, et stans in cornu Epistolæ dicit super eos sequentes Orationes, manibus junctis:

Orémus.

Propitiáre, Dómine, supplicatióibus nostris, et institútis tuis, quibus propagatiónem húmáni géneris ordinásti, benignus assiste: ut quod te auctóre júngitur, te auxiliánte servéntur. Per Dóminum nostrum Jesum Christum Fílium tuum: Qui tecum vivit et regnat in unitáte Spíritus sancti Deus: per ómnia sæcula sæculórum.

R. Amen.

Orémus.

Deus, qui potestáte virtútis tuæ de nihilo cuncta fecísti: qui dispósitis universitátis exórdiis, hómini ad imáginem Dei facto, ídeo inseparábilis mulieris adjutórium condidísti, ut femíneo córpori de virili dares carne princípium, docens quod ex uno placuisset institui, numquam licére disjúngi: Deus, qui tam excellénti mystério conjugálem cópulam consecrásti, ut Christi et Ecclésiæ Sacraméntum præsignáres in fécere nuptiarum: Deus, per quem múlier júngitur viro, et societas princípáliter ordináta, ea benedictióne doná-tur, quæ sola nec per originális peccáti pœnam, nec per dilúvii est abláta senténtiam: réspice propítius super hanc fámulam tuam, quæ maritáli jungénda consórtio, tua se expetit protectióne muniri: sit in ea jugum dilectiúnis et pacis: fidélis et casta nubat in Christo, imitárixque sanctárum permáneat feminárum; sit amábilis viro suo, ut Rachel: sápiens, ut Rebécca: longæva et fidélis, ut Sara: nihil in ea ex áctibus suis ille auctor prævaricatiúnis usúrpet: nexa fidei, mandatísque permáneat: uni thoro juncta, contáctus illícitos fúgiat: múniat infirmitátem suam róbre disciplínæ: sit verecúndia gravis, pudóre venerábilis, doctrínis cœléstibus erudíta: sit fecúnda

in sóbole, sit probáta et innocens: et ad Beatórum réquiem, atque ad cœléstia regna pervéniat: et vídeant ambo filios filiórum suórum, usque in tértiam et quartam generatióem, et ad optátam pervéniant senectútem. Per eúmdem Dóminum nostrum Jesum Christum Filium tuum: Qui tecum vivit et regnat in unitáte Spíritus sancti Deus, per ómnia sœcula sœculórum. **R.** Amen.

Tum Pontifex reversus ad medium altaris dicat: Libera nos, quæsumus Dómine, et reliqua more solito; et postquam sumpserit sanguinem, communicet Sponsos, et prosequatur Missam.

Dicto Benedicámus Dómino; vel si Missæ illius diei conveniat, Ite Missa est, antequam populo benedicat, conversus ad Sponsum et Sponsam coram altari genuflexos, dicit sine mitra, et manibus junctis, sequentem Orationem:

Deus Abraham, Deus Isaac, et Deus Jacob sit vobiscum: et ipse adimpleat benedictiõnem suam in vobis: ut videátis filios filiórum vestrórum usque ad tértiam, et quartam generatióem, et póstea vitam ætérnam habeátis sine fine: adjuvánte Dómino nostro Jesu Christo, qui cum Patre, et Spíritu sancto vivit et regnat Deus, per ómnia sœcula sœculórum. **R.** Amen.

Pontifex sedet cum mitra, et eos moneat sermone gravi ut sibi invicem servent fidem: orationis tempore, et præsertim jejuniorum ac solemnitate, casti maneant: et vir uxorem, atque uxor virum diligat: et in timore Dei permaneant. Postea surgens eos aspergat aqua benedicta, et, deposita mitra, et dicto Pláceat tibi sancta Trínitas, etc., ex more benedicit subdens: Sit nomen Dómini benedictum, etc., et dat benedictionem, more solito: et legit, ut solitum est, Evangelium sancti Joannis: In princípio erat Verbum, etc.

Ceterum si quæ Provinciæ aliis, ultra prædictas, laudabilibus consuetudinibus, et cæremoniis in celebrando Matrimonii Sacramento utuntur, eas sancta Tridentina Synodus optat retineri.

RITUS ET FORMULA

ABSOLUTIONIS ET BENEDICTIONIS PONTIFICALIS POST HOMILIAM SEU SERMONEM INFRA MISSÆ SOLEMNIS CELEBRATIONEM.

Rinito sermone, Diaconus qui cantavit Evangelium, conversus ad Episcopum stantem cum mitra, cantabit confessionem in tono prout habetur in Rituali Romano, et dum dicit tibi Pater, et te Pater, si fuerit Canonicus, profunde se inclinabit, si non fuerit Canonicus, genuflectet.

Finita Confessione per Diaconum, Episcopus sedet, et sermocinator, qui in pulpito dum cantatur Confessio genuflectet, surgens publicabit Indulgentiam in forma sequenti, videlicet:

Reverendíssimus in Christo Pater et Dóminus, Dóminus **N.** Dei et Apostólicæ Sedis grátia hujus sanctæ **N.** Ecclésiæ Episcopus, dat, et concédit ómnibus hic præsentibus quadragínta dies de vera Indulgéntia in forma Ecclésiæ consuéta. Rogáte Deum pro felíci statu Sanctíssimi Dómini nostri **N.** divína Providéntia Papæ **N.** Dominationis suæ Reverendíssimæ, et sanctæ Matris Ecclésiæ.

Publicata Indulgentia, Episcopus, deposita mitra, surget et leget ex libro in tono Orationis versus populum, ut infra:

Précibus et méritis beátæ Mariæ semper Vírginis, beáti Michaélis Archángeli, beáti Joánnis Baptistæ, Sanctórum Apostolórum Petri et Pauli, et ómnium Sanctórum, misereátur vestri omnipotens Deus, et dimíssis peccátis vestris, perdúcat vos ad vitam ætérnam.

R. Amen.

Indulgéntiam, absolutiõnem, et remissiõnem peccatórum vestrórum tríbuat vobis omnipotens, et miséricors Dóminus. **R.** Amen.

Deinde reassumpta mitra, benedicens populo more consueto, dicit:

Et benedictio Dei omnipoténtis Pa ✠ tris, et Fí ✠ lii, et Spíritus ✠ sancti descéndat super vos, et máneat semper. **R.** Amen.

Si autem erit Archiepiscopus, statim publicata Indulgentia, Capellanus portabit ante illum Crucem, quam genuflexus tenebit, et Archiepiscopus surgens, deposita mitra, prius Cruci caput profunde inclinabit, et deinde adhuc stans prosequetur Précibus, etc. et sic, detecto capite, solemniter benedicet.

RITUS ET FORMULA BENEDICTIONIS APOSTOLICÆ.

Ritus, et forma, a Patriarchis, Primatibus, Archiepiscopis et Episcopis pro impertienda Benedictione, una cum plenaria Indulgentia post Missarum solemniam, triplici signo crucis emisso, et in Episcopali throno cum mitra, ceterisque sacris paramentis indutis, circumstantibus ministris, adhibendus, quod congrue de Prælatibus inferioribus intelligatur, talis esse debet.

Expleta in utraque solemnitate Missæ solemnibus celebratione, in primis alta voce per ministrum superpelliceo indutum legantur litteræ Apostolicæ, quibus Indulgentia plenaria conceditur, una cum potestate Benedictionem Apostolicam super populum effundendi, ut de delegatione astantibus constet, et concessio ex latino sermone in vulgarem ad populi intelligentiam translata recitetur. Postea Episcopus surgens, juxta Ritus in Cæremoniali Episcoporum expressum, dicit:

Précibus, et méritis beátæ Mariæ semper Vírginis, beáti Michaélis Archángeli, beáti Joánnis Baptistæ, et sanctórum Apostolórum Petri et Pauli, et ómnium Sanctórum:

Misereátur vestri omnipotens Deus, et dimíssis ómnibus peccátis vestris, perdúcat vos Jesus Christus ad vitam ætérnam.

R. Amen.

Indulgéntiam, absolutiõnem, et remissiõnem ómnium peccatórum vestrórum, spátium veræ, et fructuósæ pœniténtiæ, cor semper pœnitens, et emendatiõnem vitæ, perseverántiam in bonis opéribus tríbuat vobis omnipotens, et miséricors Dóminus. **R.** Amen.

Et benedictio Dei omnipoténtis Pa ✠ tris, et Fí ✠ lii, et Spíritus ✠ sancti descéndat super vos, et máneat semper. **R.** Amen.

Demum post impertitam benedictionem, publicabitur latino, et vernaculo idiomate concessio plenariæ Indulgentiæ, sequenti formula:

Attentis facultatibus a Sanctissimo in Christo Patre et Domino nostro Domino **N.** divina providentia Papa **N.**, in enuntiatis Apostolicis Litteris expressis, datis Reverendissimo Domino Domino **N.** Dei, et Apostolicæ Sedis gratia hujus sanctæ **N.** Ecclesiæ Antistiti, eadem Dominatio sua Reverendissima, Summi Pontificis nomine, dat et concedit omnibus hic presentibus vere poenitentibus, et confessis, ac sacra communione refectis Indulgentiam Plenariam in forma Ecclesiæ consueta: rogate igitur Deum pro felici statu Sanctissimi Domini nostri Papæ, Dominationis suæ Reverendissimæ, et sanctæ Matris Ecclesiæ.

ORDO BENEDICTIONIS AQUÆ

PRO RECONCILIATIONE ECCLESIAE AB EPISCOPO FACIENDÆ.

Benedictio hujus aquæ fieri potest omni die. Parantur pro Episcopo faldistorium super tapete, rochetum, stola, et mitra simplex. Insuper, supra mensam tobalea coopertam parantur unum vas cum sale, vas cum aqua benedicenda; vas cum cineribus; et vas vini.

Pontifex ornatus rochetto (vel, si Regularis sit, superpelliceo) assumet stolam et mitram, deinde prope faldistorium stans cum mitra, aquæ benedictionem ab exorcismo salis incipiens, dicit absolute:

V. Adjutorium nostrum in nomine Domini.

R. Qui fecit cælum et terram.

Exorcizo te, creatura salis, in nomine Domini nostri Jesu Christi, qui Apostolis suis ait: Vos estis sal terræ; et per Apostolum dicit: Sermo vester semper in gratia sale sit conditus; ut sanctificeris ad reconciliationem Ecclesiæ, ad expellendas omnes demonum tentationes; et omnibus qui ex te sumpserint, sis animæ et corporis tutamentum, sanitas, protectio, et confirmatio salutis. Per eundem Dominum nostrum Jesum Christum Filium tuum, qui venturus est judicare vivos et mortuos, et sæculum per ignem.

R. Amen.

Deinde, deposita mitra, dicat:

V. Dominus vobiscum. **R.** Et cum spiritu tuo.

Orémus.

Domine Deus, Pater omnipotens, qui hanc gratiam cœlitus salis tribuere dignatus es, ut ex illo possint universa condiri, quæ hominibus ad escam procreasti: bene **✠** dic hanc creaturam salis, ad effugandum inimicum, et ei salubrem medicinam immitte, ut proficiat sumentibus ad animæ et corporis sanitatem. Per Christum Dominum nostrum. **R.** Amen.

Tum, assumpta mitra, dicit absolute Exorcismum aquæ.

Exorcizo te, creatura aquæ, in nomine Dei Pa **✠** tris, et Fi **✠** lii, et Spiritus **✠** sancti, ut repellas diabolum a termino justorum, ne sit in umbraculis Ecclesiæ. Et tu, Domine Jesu Christe, infunde Spiritum sanctum in Ecclesiam tuam, ut proficiat ad sanitatem corporum animarumque adorantium te, et magnificetur nomen tuum in gentibus; et increduli corde convertantur ad te, et non habeant alium Deum, præter te Dominum solum; qui venturus es judicare vivos et mortuos, et sæculum per ignem.

R. Amen.

Deinde, deposita mitra, dicit:

V. Domine exaudi orationem meam.

R. Et clamor meus ad te veniat.

V. Dominus vobiscum. **R.** Et cum spiritu tuo.

Orémus.

Domine Deus, Pater omnipotens, statutor omnium elementorum, qui per Jesum Christum Filium tuum Dominum nostrum elementum hoc aquæ in salutem humani generis esse voluisti, te supplices deprecamur: ut, exauditis orationibus nostris, eam tuæ pietatis aspectu sancti **✠** fices; atque ita omnium spirituum immundorum ab ea recedat incursio, ut ubicumque fuerit in nomine tuo aspersa, gratia tuæ benedictionis adveniat, et mala omnia, te propitiante, procul recedant. Per eundem Dominum nostrum Jesum Christum Filium tuum: Qui tecum vivit et regnat Deus, per omnia sæcula sæculorum. **R.** Amen.

Tum stans sine mitra, dicit super cineres.

Benedictio cinerum.

V. Domine exaudi orationem meam.

R. Et clamor meus ad te veniat.

V. Dominus vobiscum. **R.** Et cum spiritu tuo.

Orémus.

Omnipotens sempiternus Deus, parce poenitentibus, propitiare supplicantiibus: et mittere digneris sanctum Angelum tuum de cœlis, qui bene **✠** dicat, et sancti **✠** ficet hos cineres, ut sint remedium salubre omnibus nomen sanctum tuum humiliter implorantibus, ac semetipsos pro conscientia delictorum suorum accusantibus, ante conspectum divinæ clementiæ tuæ facinora sua deplorantibus, vel serenissimam pietatem tuam suppliciter obnixèque flagitantibus; et præsta, per invocationem sanctissimi nominis tui, ut quicumque eos super se asperserint, pro redemptione peccatorum suorum, corporis sanitatem, et animæ tutelam percipiant. Per Christum Dominum nostrum. **R.** Amen.

Tum Pontifex accipit sal, et miscet cineri in modum crucis, dicens:

Commixtio salis et cineris páriter fiat: In nómine Pa ✠ tris, et Fí ✠ lii, et Spíritus ✠ sancti. **R.** Amen.

Deinde accipiens pugillum de mistura salis et cinerum, in modum crucis ter mittit in aquam, qualibet vice dicens:

Commixtio salis, cineris, et aquæ páriter fiat: In nómine Pa ✠ tris, et Fí ✠ lii, et Spíritus ✠ sancti. **R.** Amen.

Deinde, stans sine mitra, dicit super vinum.

Benedictio vini.

V. Dómine exaúdi orationem meam.

R. Et clamor meus ad te véniat.

V. Dóminus vobiscum. **R.** Et cum spíritu tuo.

Orémus.

Dómine Jesu Christe, qui in Cana Galilææ ex aqua vinum fecisti, quique es vitis vera: multiplica super nos misericórdiam tuam: et bene ✠ dicere et sancti ✠ ficare dignéris hanc creatúram vini, ut ubicúmque fustum fúerit, vel aspérsus, divínæ id benedictionis tuæ opuléntia repleátur, et sanctificétur: qui cum Patre et Spíritu sancto vivis et regnas, per ómnia sæcula sæculórum. **R.** Amen.

Deinde mittit, in modum crucis, vinum in aquam ipsam, dicens:

Commixtio vini, salis, cineris, et aquæ páriter fiat: In nómine Pa ✠ tris, et Fí ✠ lii, et Spíritus ✠ sancti. **R.** Amen.

V. Dómine exaúdi orationem meam.

R. Et clamor meus ad te véniat.

V. Dóminus vobiscum. **R.** Et cum spíritu tuo.

Orémus.

Omnípotens sempitérne Deus, creátor et conservátor humáni géneris, et dator grátie spirituális, ac largitor æternæ salutis, emitte Spíritum sanctum tuum super hoc vinum cum aqua, sale, et cinere mixtum: ut armátum cœlestis defensione virtútis, ad reconciliatióem Ecclésiæ tuæ proficiat. Per Dóminum nostrum Jesum Christum Fílium tuum, qui tecum vivit et regnat in unitate ejúsdem Spíritus sancti Deus, per ómnia sæcula sæculórum.

R. Amen.

Expleta oratione, Pontifex, deposita stola et rochetto, vadit in pace.



SUPPLEMENTUM

AD APPENDICEM PONTIFICALEM ROMANI.

DE ECCLESIE DEDICATIONE

SEU CONSECRATIONE, SI PLURA ALTARIA SIMUL CONSECRENTUR.

Ecclésiæ Consecratio, quamvis omni die de jure fieri possit, decetius tamen in Dominicis diebus, vel Sanctorum solemnitatibus fit.

Quando autem Ecclesia fuerit dedicanda, debet Archidiaconus prænuntiare clero et populo, quibus est Ecclesia consecranda; ut priusquam consecratur, jejurent. Nam Pontifex consecrans, et qui petunt sibi Ecclesiam consecrari, præcedenti die jejunare debent. Sane sero ante diem Dedicatióis, Pontifex parat Reliquias in altaribus consecrandis includendas, ponens eas pro unoquoque altari in decenti et mundo vasculo, cum tribus granis thuris; ponit etiam in eis chartulam de pergamento, scriptam sub hac forma:

MDCCC. etc. . . . die N. mensis N. Ego N. Episcopus N. consecravi Ecclesiam et altare hoc, in honorem Sancti N. et Reliquias Sanctorum Martyrum N. et N. in eo inclusi, et singulis Christi fidelibus hodie unum annum, et in die anniversario Consecrationis hujusmodi ipsam visitantibus quadraginta dies de vera Indulgentia, in forma Ecclesiæ consueta concessi.

Sigillans ipsa singula vascula diligenter, et illa in honesto et mundo loco, vel sub tentorio ante fores Ecclesiæ consecrandæ parato ponens, et super ornatum feretrum decenter collocans, cum duobus candelabris et luminaribus ardentibus.

Celebrandæque sunt vigiliæ ante Reliquias ipsas, et canendi Nocturni, et Matutinæ Laudes, in honorem Sanctorum, quorum Reliquiæ sunt recondendæ; imagines vero, cruces, et alia ipsa nocte remaneant in Ecclesia consecranda.

Parantur etiam in Ecclesia, quæ ad Dedicatióem ipsius Ecclesiæ et altarium sunt necessaria, videlicet sanctum Chrisma in vasculo et ampulla; Oleum sanctum Catechumenorum, etiam in vasculo et ampulla; duæ libræ thuris, cujus medietas sit in granis; thuribulum cum navicula et cochleari; vas cum prunis ardentibus; vas cum cineribus, pro quantitate Ecclesiæ; vas cum sale; vas vini; aspersionum factum de herba hyssopi; mantilia ex tela grossa, ad extergendas mensas altarium, quoties expedierit; coopertura linea cerata, ad mensuram altaris,